



Cura ch'ìls gustabs van in tanter l'auter.

Balbegiar!?

■ (cp) **Pausa gronda en scola – stanza da scolasts. I splunta. In scolast sa s'auza ed avra l'isch. Shady, in mattatsch da la segunda classa, è avant isch e guarda sin il scolast cun gronds igls: In «E» seschluitta or da sia bucca; la bucca ed il chau sa muventan vi e nà, dapli na vegn Shady betg da dir.**

Tensiuin malempernaivla è en l'aria – er en il gremi da scolasts che baivan café. Finalmain di il scolast: «L'emprim vegn salidà!» Era quai na schlucça betg la lieunga da Shady. Pir cura ch'il scolast di en in tun fin e plaun: «Bun di Shady» vegn il mattatsch da salidar e raquintar cun bleras pausas, repetiziuns e bloccadas ses intent.

Shady balbegia. Quai n'è betg adina stà uschia. Shady ha absolvì in normal svilup dal linguatg. Cun tschintg onns ha el gi' ina lunga fasa intensiva da balbegiar, suenter è ses linguatg stà puspè flessegiant e sa bloccava mo pli en situaziuns spezialas. A la fin dal l'emprima classa è il balbegiar vegnì puspè uschè ferm che Shady ha entschert, sin giavisch dal scolast e dals geniturs, ina terapia da logopedia.

Circa 5% dals uffants ed 1% dals creschids balbegian. En il mument na sa la raschun per il balbegiar betg vegnir respundida cleramain da vart da la scienza.

Ins quinta che plirs facturs gioghian ina rolla e ch'ìls facturs èn tar mintage balbegiader differents. Ina terapia sa gidar bain tar balbegiar. I dat bleras metodas da terapia. En ils blers cas dovri ina pli lunga terapia ed in trenament constant da vart dal pertutgà per ch'i sa mussia in progress.

Tar il cas da Shady savess la discrepanza tranter ses ferm desideri suenter forza ed esser «cool» e sia sensibla vart interna esser in motiv per ses balbegiar. In segund factor per il segund stausch savess esser la primavaira araba: Il bab da Shady è oriund da l'Egipta, sia famiglia viva a Kairo e tut ils schabetgs da l'onni passà èn vegnids persecitads minuziusamain. La logopeda discorra cun Shady sur da quels facturs da squitsch e lavura medemamain tenor la metoda «Kids – Kinder dürfen stottern/ASB – affons dastgan balbegiar», Tar quella metoda è il balbegiar il tema central e vegn perscrutà. En in segund pass vegnan strategias encuretgas ed exercitadas per gidar a schliar las bloccadas.

Igl è ina gronda finamira da las logopedas da tut l'Europa da discutir il tema balbegiar per che la populaziun enconuschia las reglas impurtantas per il contact cun pertutgads e ch'ìls pertutgads enconuschian las puschidas d'agid e sustegn.

Di europeic da logopedia

Il Di europeic da logopedia dals 6 da mars 2012 porscha ina platatufurma per il tema balbegiar e pussibilitesch da derasar massa infurmaziuns a la populaziun.

En l'aula Halde da la Scola chantunala a Cuira vegn preschentà il teater musical «Stottern und Poltern» gievgia, ils 15 da mars a las 19.30.

Plinavant ha lieu ina discussiun cun il BBL (Berufsverband der Bündner Logopädinnen) e cun pertutgads.

Ulteriuras infurmaziuns:
Terapia intensiva per affons denter 10 e 18 onns, «Sprachheilschule St.Gallen».
Annunzia tier
d.suarez@sprachheilschule.ch. Davos termin d'annunzia 31 da mars 2012

Vereinigung für Stotternde und Angehörige, info@versta.ch

Dapli infurmaziuns e links:
www.logopaedie.ch,
www.logopaedie-gr.ch